

UTUSAN MALAYSIA

DATE: 20/08/2007

# PM janji keadilan semua kaum

UM- 20/8/2007

**Pemimpin yang adil tidak akan melakukan diskriminasi dan bagi saya pemimpin yang sengaja melakukan perkara ini tidak layak digelar sebagai pemimpin**

**ABDULLAH  
AHMAD  
BADAWI**  
Perdana Menteri

**KUALA LUMPUR** 19 Ogos – Datuk Seri Abdullah Ahmad Badawi hari ini berjanji akan menjadi seorang Perdana Menteri yang adil kepada semua kaum di negara ini.

“Pemimpin yang adil tidak akan melakukan diskriminasi dan bagi saya pemimpin yang sengaja melakukan perkara ini tidak layak digelar sebagai pemimpin.

“Saya sendiri akan berusaha menjadi seorang Perdana Menteri yang adil dan inilah janji saya,” kata beliau ketika berucap di hadapan 1,700 perwakilan pada Perhimpunan Agung MCA kali ke-54 di Wisma MCA di sini.

Katanya, sebagai pemimpin tertinggi negara, beliau akan memastikan semua pihak terus mendapat layanan yang saksama tanpa wujud sebarang diskriminasi.

Menurut Perdana Menteri, persefahaman antara UMNO, MCA dan MIC yang telah terjalin sejak era parti Perikatan 50 tahun lalu perlu dipelihara sepenuhnya.

Beliau berkata, hasil permuafakatan ketiga-tiga parti tersebut telah berjaya membebaskan negara dan rakyat daripada cengkaman penjajah.

“UMNO, MCA dan MIC mempunyai sejarah yang cukup panjang. Saya mahu hubungan yang telah terjalin sejak sekian lama ini dipelihara dan dijaga,” ujarinya.

Beliau menambah, hasil permuafakatan dengan parti lain dalam komponen Barisan Nasional (BN) telah menjadikan BN terus kuat hingga ke hari ini.

Dalam ucapannya, Abdullah mengingatkan semua parti komponen BN supaya terus bekerja dan dalam masa yang sama jangan menghiraukan permainan pihak pembangkang.

“Memang kerja pihak pembangkang suruh kita bergaduh. Jangan hiraukan mereka... kita perlu terus bekerja untuk rakyat.

“Tugas kita masih banyak yang belum selesai dan masih banyak perkara yang perlu dilakukan,” tambahnya.